

**Protocol dalla 63avla radunonza generala da Sumvitg Turissem,
venderdis ils 6 da zercladur 2025, allas 20.00 uras el hotel Greina a Rabius**

Tractandas

1. Beinvegni
2. Elecziun d'in dumbravuschs
3. Approbaziun dil protocol 2024
4. Rendaquen 2024
5. Rapport dils revisurs
6. Approbaziun dil quen 2024
7. Preventiv 2025
8. Rapport dil president
9. Mutaziuns da commembers
10. Elecziun/Reelecziun: 1 president/a (elecziun)
1 commember/a suprastonza (reelecziun)
1 commember/a da quen e gestiun (reelecziun)
11. Orientaziuns
12. Varia

Beinvegni e presenza

Il president Andy Monn arva la 63avla radunonza generala e fa beinvegni a 17 presents. Schau perstgisar han: Candinas Martin, cusseglier naziunal, Schaniel Patrick, president communal, Collenberg Fabian, canzlist communal, Duff Marcus, Gadola Corsin, Huonder Gion Battesta, Huonder Giordana, Baselgia Duri, Rapaport Anita, Deplazes Leci e Manuela, Scolieri Nadja, Lozza Pirmin, Flepp Felix.

2. Elecziun da dumbravuschs

Sco dumbravuschs vegn elegiu Ignaz Deplazes.

3. Approbaziun dil protocol dalla 62avla radunonza generala dils 17 da matg 2024

Il protocol dalla 62avla radunonza generala dils 17 da matg 2024 vegn approbaus unanimamein.

4. Quen annual 2024

La secretaria Anita Demont dat sclariment sur dil quen 2024 il qual siara cun in gudogn da frs. 14'468.34. La facultad da noss'uniun munta daniev frs. 47'044.68.

5. **Rapport dils revisurs**

Nossa revisura da quen Anita Duff prelegia il rapport dils revisurs dil quen 2024. Ils contos e la bilanza constattan cun la contabilitad. Ils revisurs fan la proposta d'approbar il quen 2024.

6. **Approbaziun dil quen 2024**

Il quen e la bilanza vegnan approvai unanimamein.

7. **Preventiv 2025**

Il president Andy Monn metta avon cuort e bein il preventiv 2025. Unanimamein vegn quel approbaus.

8. **Rapport dil president**

Cun quei rapport lessel schar repassar cuortamein il curriu e passau da Sumvitg Turissem duront il davos onn, pia naven dalla davosa radunonza generala dils 14 da matg 2024 tochen oz.

Pernottaziuns dils 01-11-2023 – 31-10-2024

Naven dall'entschatta november 2023 tochen fin d'october 2024 ei vegniu notau total 14'966 pernottaziuns. Quei ein 7'635 pernottaziuns dapli ch'ella perioda avon. Quei marcant augment seresulta ord il camp da battasendas Grischun (KaLa GR) dils 22-7 tochen ils 3-8-2024 a Plaun Petschen.

Quei ei in record extraordinari che succeda buca mintg'on.

Bus alpin 2024 / 22 da zercladur tochen ils 6 d'october 2024

Il Bus Alpin ha transportau duront quei temps total 382 personas, 2023 era quei stau 292. Legreivlamein han 25 sponsurs susteniu quei survetsch cun ina reclama electronica sil finistrel el bus. Bien engraziament ad els. In engraziel lessel far alla GreinaBus GmbH sco interprendidra da quella purschida. En collaboraziun cun Lumnezia Tourismus, Sumvitg Turissem e Blenio Turismo ei danovamein vegniu realisau il plan faldau cun igl urari ed informaziuns supplementaras.

Purschidas

Parc da reiver Igniu

L'entschatta zercladur 2024 havein saviu arver il parc da reiver ad Igniu. Quel ei vegniu realisau el decuors dalla primavera dils guides da muntogna Ervin Jacomet da Surrein ed Otti Flepp da Mustér.

Las 10 rutas ein baghegiadas en differents livels ed adattadas per entscheviders, affons ni sco trenament per revidras/reviders cun experienza. Cun quella caschun engraziein als guides da muntogna sco era a tuts sponsurs e donaturs. Il zercladur ed il settember 2024 ei vegniu menau atras plirs cuors da revier per las scolas cun Ervin Jacomet. Cun grond plascher savein constatar che la nova purschida vegn nezegiada stediamein dad indigens e turists.

Senda da scursalar Puzastg – Surrein

La senda da scursalar Puzastg tochen Surrein ei vegnida preparada l'entschatta december 2024 e stada aviarta tochen il davos da schaner 2025. Quei ei stau pusseivel cun risguardar las mesiras da segirtad necessarias. Suenter il davos da schaner ha la munconza da neiv

buca schau tier da nezegiar la purschida vinavon. Ils 3 da schaner 2025 havein organisau ina sera da scursalar cun apero ella Destillaria vischinonta. In special engraziell lessel admetter als preparatur dalla senda.

Tura virtuala d'unviern

Sigl unviern 2024/2025 ei vegniu finalisau la tura virtuala d'unviern. Quella cumpletescha la tura virtuala da stad, ch'ei vegnida realisada silla stad 2023. Quei project ei vegnius purtaus da Sumvitg Turissem communabel cun Trun Turissem e realisau da Panotour. Ella vegn integrada silla plattaforma da Surselva Tourismus (surselva.info) e silla pagina web dallas duas vischnauncas. La finamira ei da presentar nossa biala cuntrada e promover nossa purschida ed il turissem sin moda virtuala.

Infrastructura

Igl ei vegniu fatg lavur cumina el parc da bike e da reiver ad Ignu. Ins ha stuiu allontanar tschespets e pastg ord la ruta da bike. Quei ei per part vegniu fatg cun in pign excavatur, denton era a maun cun pala e zappun. Plinavon ei vegniu montau ina seiv nova dalla vart diils parcadis encunter sid. Igl onn passau ei vegniu remplazzau e renovau entgins bauns en vischnaunca.

Occurrenzas

Camp da battasendas Grischun 2024 (KaLA GR) a Plaun Petschen / Resgia

Il grond eveniment digl onn ei bein stau il camp da battasendas Grischun 2024 diils 22-7 – 3-8-2024 a Plaun Petschen/Resgia. Buca meins che 350 battasendas e 50 menadras/menaders ein „secasai“ quei temps leu. Els han drizzau en lur tendas da durmir e suschnas per cuschnar e menau atras duront quei temps differentas activitads ella natira vischinonta. Era treis guidas per la populaziun indigena han els organisau. Quei event ei bein stau ina oreifra reclama per nossa regiun.

Guida „Wildbeobachtung“ / 15 da settember 2024

Ils 15 da settember 2024 ei vegniu menau atras ina ulteriura guida sil Lag da Laus cul motto „Wildbeobachtung in der Gemeinde Sumvitg“. Total 20 persunas (16 carschi e 4 affons) ein vegni accompignai dil survigilader da catscha Andriu Degonda e dil catschadur Andreas Baselgia. Deplorablamein ha la nebla impedi empau la vesida sils animals selvadis. Denton ha igl Andriu saviu dar biaras informaziuns allas visitadras ed ils visitaders ed aschia contribuuiu al beingartegiar da quella biala spassegiada.

Giubileum 200 onns emprem'ascensiun sil Tödi entras pader Placi a Spescha

En rama da quei giubileum ha Sumvitg Turissem organisau la dumengia, ils 27 d'october 2024 in teater en casa da scola a Surrein. Sut il motto „Speck auf dem Tödi“ han Gian Rupf (teater) e Franky Gehrig (musica) delectau il numerus publicum cun historias e humor ord da quei temps.

En connex cun quei giubileum rodund ha l'uniun realisau ina tabla commemorativa, la quala ei vegnida plazzada en in liug bein veseivel sper via avon il Lag da Barcuns.

Treis ulteriurs events ella regiun han honorau quei mument historic. In ein staus la presentaziun (premiera) dil film documentar da Bertillo Giossi ella sala da cultura a Trun. In secund il referat da Pader Placi a Spescha cun Renzo Caduff a Mustér e plinavon ina presentaziun dil geolog Adrian Pfiffner a Trun el museum.

Reclama

Flyer faldau

Sin primavera 2024 ha Sumvitg Turissem realisau in flyer faldau per la stad cun si informaziuns e puschidas dalla vischnaunca. Per igl unviern 2024/2025 ei lu vegniu fatg in culla puschida d'unviern.

Havein schau producir ina nova banderola da reclama per pender a Rabius sur via vi. Plinavon ina blaha da reclama da 2x1 m per diever duront occurrenz.

Engraziament

Cun quella caschun lessel admetter a mes consuprastonts in grond engraziament per lur engaschi e la buna collaboraziun. Engraziel era alla secretaria Anita Demont sco era al genau Meinrad Degonda. Plinavon engraziels als revisurs da quen Anita Duff e Corsin Gadola per lur engaschi per il turissem local.

Era alla vischnaunca da Sumvitg, a tuts purtaders sco era persunas ch'ei s'engaschadas lessel admetter en num da Sumvitg Turissem in grond engraziament!

9. Mutaziuns da commembers(a)

Sumvitg Turissem astga beneventar entgins novs commembers, numnadamein Alois Maissen, Gino Maissen, Maurus Rohner, Heinrich Graf, Catharina Graf e Marco Schläpfer. Extradadas hai dau neginas.

10. Elecziuns

Suenter dudisch onns sco president da Sumvitg Turissem ha Andy Monn decidiu d'encurir in successeur per quei post. La suprastanza da Sumvitg Turissem engrazia agl Andy per siu grond engaschi e la gronda lavur prestada en favur da Sumvitg Turissem. Daniev vegn elegiu in copresidi da Sumvitg Turissem numnadamein Andreas Baselgia e Gabriel Candinas ad interim per in onn. In grond engraziament als dus niev elegi presidents. Nies commember da suprastanza Torino Maissen vegn reelegius per ina perioda da treis onns. Al Torino in grond engraziament per siu grond engaschi e sia grondiusa lavur. Vinavon vegn Gino Maissen elegius sco niev commember da suprastanza da Sumvitg Turissem. Nus giavischein a Gino Maissen bia plascher en sia nova funcziun. Vinavon vegn nossa revisura da quen Anita Duff reelegida per ina perioda da treis onns. Era ad ella in grond engraziament per sia lavur.

11. Orientaziuns

Tier las orientaziuns ha nies president Andy fatg ina presentaziun da PowerPoint sur dils projects e las activitads digl onn current.

12. Varia

Suenter ca. 1½ uras siara nies president Andy Monn la radunonza ed engrazia per la presenza e la discussiun.

Sumvitg, zercladur 2025

Andy Monn

Anita Demont